

## Xususiy tibbiyot tashkilotlarini yanada rivojlantirish bo'yicha qo'shimcha shart-sharoitlarni yaratish to'g'risida

---

### **O'zbekiston Respublikasi Prezidentining Qarori**

O'zbekiston Respublikasi Prezidentining 2017 yil 1 apreldagi «Sog'liqni saqlash sohasida xususiy sektorni yanada rivojlantirish chora-tadbirlari to'g'risida»gi PQ-2863-son qaroriga muvofiq, sog'liqni saqlashning xususiy sektorini yanada rivojlantirish bo'yicha xususiy tibbiyot tashkilotlarining faoliyati uchun qulay shart-sharoitlar yaratish, ular faoliyatini tartibga solish va litsenziyalash tizimini takomillashtirish, ko'rsatilayotgan xizmatlar hajmi va turlarini oshirishni rag'batlantirishga qaratilgan keng ko'lamli ishlar amalga oshirildi.

O'tgan davr mobaynida sog'liqni saqlashning xususiy sektori tomonidan ko'rsatilayotgan tibbiy xizmatlar turlari 50 tadan 126 taga ko'paydi. Stomatologiya va kosmetologiya tashkilotlaridan tashqari xususiy tibbiyot tashkilotlari 2022 yilning 1 yanvarigacha barcha turdagi soliqlar va majburiy ajratmalar, shuningdek, olib kelinadigan yangi tibbiyot asbob-uskunalar, butlovchi buyumlar, ularning ehtiyot qismlari va zarur materiallar uchun bojxona to'lovlarini to'lashdan ozod etildi.

Qishloq joylarda tibbiy xizmatlar ko'rsatish sohasida yangi tashkil etiladigan mikrofirmalar va kichik korxonalar davlat ro'yxatiga olingan kundan boshlab 10 yil muddatga yagona soliq to'lovini to'lashdan ozod etilishi qishloq va olis tumanlarda xususiy tibbiyotni jadal rivojlantirish imkonini berdi.

Natijada xususiy tibbiyot muassasalarining soni 440 taga ko'payib, ularning umumiy soni 4 mingga yetdi.

Shu bilan birga, davlat tibbiyot muassasalarining ayrim funksiyalarini sog'liqni saqlashning xususiy sektoriga o'tkazish, mazkur sohada davlat-xususiy sherikchiligini rivojlantirish, shuningdek, respublikada va chet elda tibbiy kadrlarning malakasini oshirish, tibbiyot tashkilotlarini akkreditatsiyalash tizimini joriy etish masalalari dolzarbligicha qolmoqda.

Sogʻliqni saqlashning xususiy sektorini rivojlantirishni yanada ragʻbatlantirish, kadrlarni tayyorlash, qayta tayyorlash va malakasini oshirish uchun shart-sharoitlarni yaxshilash, shuningdek, koʻrsatilayotgan tibbiy xizmatlar hajmlarini yanada kengaytirish, xususiy tibbiyot sohasiga investitsiyalarni jalb qilish maqsadida:

1. Oʻzbekiston Respublikasi Sogʻliqni saqlash vazirligi (Shodmonov) va Oʻzbekiston Respublikasi Moliya vazirligi (Qoʻchqorov)ning davlat tibbiyot tashkilotlari funksiyalarini davlat-xususiy sherikchiligi asosida tadbirkorlik sub'yektlariga oʻtkazish yuzasidan chora-tadbirlarni bosqichma-bosqich amalga oshirish:

yordamchi boʻlinmalar (oziq-ovqat bloklari, kir yuvish xonalari va boshqalar) faoliyatini taʼminlash;

roʻyxati Oʻzbekiston Respublikasi Sogʻliqni saqlash vazirligi tomonidan aniqlanadigan ayrim tibbiy xizmatlarni koʻrsatish yuzasidan takliflari maʼqullansin.

2. 2018-2019 yillarda hududlarda xususiy tibbiyot tashkilotlarini tashkil etish va faoliyatini kengaytirish boʻyicha parametrlar ilovaga muvofiq tasdiqlansin.

3. Qoraqalpogʻiston Respublikasi Vazirlar Kengashi, viloyatlar va Toshkent shahar hokimliklari:

bir haftalik muddatda 2018-2019 yillarda xususiy tibbiyot tashkilotlarini tashkil etish va faoliyatini kengaytirish boʻyicha loyihalarning manzilli roʻyxati (keyingi oʻrinlarda manzilli roʻyxat deb ataladi) va uning "yoʻl xaritasi"ni mazkur qaror ilovasiga muvofiq tasdiqlasin.

Oʻzbekiston Respublikasi YEr resurslari, geodeziya, kartografiya va davlat kadastri Davlat qoʻmitasi bilan birgalikda manzilli roʻyxat loyihalari tashabbuskorlariga ular belgilangan tartibda zarur hujjatlarni taqdim etganda qurilishni amalga oshirish uchun yer maydonlari ajratsin;

Oʻzbekiston Respublikasi Xususiylashtirilgan korxonalariga koʻmaklashish va raqobatni rivojlantirish davlat qoʻmitasi bilan birgalikda, istisno tariqasida,

manzilli ro'yxat loyihalari tashabbuskorlariga davlat mulkidagi foydalanilmasdan turgan ob'yektlarni "nol" xarid qiymatida sotsin.

4. O'zbekiston Respublikasi Sog'liqni saqlash vazirligi, O'zbekiston Respublikasi Oliy va o'rta maxsus ta'lim vazirligi va "AKFA MEDLINE" mas'uliyati cheklangan jamiyatining:

Toshkent shahrida Koreya Respublikasi yetakchi oliy tibbiy ta'lim muassasalaridan birining faoliyatini tashkil etish;

Koreya Respublikasining tibbiyot markazlari va oliy ta'lim muassasalari bilan hamkorlikda "AKFA MEDLINE" MChJ xususiy klinikasi negizida xususiy tibbiyot muassasalarini rivojlantirish va mahalliy tibbiyot kadrlari malakasini oshirish Markazini tashkil etish;

Koreya Respublikasining ilg'or klinikalari va tibbiyot markazlarining diagnostika, davolash, servis va menejment masalalari bo'yicha tibbiy xizmat ko'rsatish bo'yicha tajribasini o'rganish va mamlakatimiz tibbiyotiga joriy etish uchun ular bilan hamkorlikni yo'lga qo'yish;

"AKFA MEDLINE" mas'uliyati cheklangan jamiyatining hududiy filiallarini tashkil etish bo'yicha takliflari ma'qullansin.

5. O'zbekiston Respublikasi Sog'liqni saqlash vazirligi (Yusupaliyev) Oliy va o'rta maxsus ta'lim vazirligi (Nabiyev) hamda "AKFA MEDLINE" MChJ (Nigmanov) bilan birgalikda bir oy muddatda mazkur qarorning 4-bandida nazarda tutilgan takliflarni amalga oshirish bo'yicha dastur loyahasini (Yo'l xaritasini) O'zbekiston Respublikasi Vazirlar Mahkamasiga tasdiqlash uchun kiritsin.

6. 2018 yil 1 yanvardan boshlab, mulkchilik shaklidan qat'i nazar, tibbiyot tashkilotlarida ishlovchi shifokor-pensionerlarga pensiya to'liq miqdorda to'lanishi belgilansin.

7. "Asaka" aksiyadorlik-tijorat banki (Mullajonov) O'zbekiston Respublikasi Sog'liqni saqlash vazirligi (Yusupaliyev) bilan birgalikda bir oy muddatda "Asaka" aksiyadorlik-tijorat banki qoshidagi nodavlat tibbiyot muassasalarini rivojlantirish jamg'armasi mablag'larining quyidagi xarajatlar nisbatini nazarda tutadigan foydalanish tartibini tasdiqlasin:

besh foiz – yuqori malakali xorijiy mutaxassislarni jalb qilish va xususiy tibbiyot tashkilotlari shifokorlarini xorijiy mamlakatlarga malaka oshirish uchun yuborishga;

to‘qson besh foiz – xususiy tibbiyot tashkilotlarini zamonaviy tibbiy asbob-uskunalar bilan jihozlashga.

8. O‘zbekiston Respublikasi Vazirlar Mahkamasi bir oy muddatda respublikaning har bir hududi uchun 1 million AQSh dollari miqdorida resurslar hajmini nazarda tutgan holda, “Asaka” aksiyadorlik-tijorat banki qoshidagi nodavlat tibbiyot muassasalarini rivojlantirish jamg‘armasining 14 million AQSh dollari miqdoridagi mablag‘larini shakllantirish manbalarini aniqlasin.

9. O‘zbekiston Respublikasi tijorat banklariga yangi tashkil etilayotgan va faoliyatini kengaytirayotgan xususiy tibbiyot tashkilotlarini, shu jumladan, manzilli ro‘yxatda nazarda tutilgan xususiy tibbiyot tashkilotlarini qo‘llab-quvvatlash maqsadida ular zamonaviy tibbiyot asbob-uskunalarini sotib olishi, shuningdek, mutaxassislarining malakasini oshirish va xorijdan yuqori malakali mutaxassislarni jalb etishni tashkil etishi uchun belgilangan tartibda imtiyozli kreditlar berish tavsiya etilsin.

10. O‘zbekiston Respublikasi Sog‘liqni saqlash vazirligi (Yusupaliyev):

a) ikki oy muddatda:

xususiy tibbiyot tashkilotlari mutaxassislarini qayta tayyorlash va ularning malakasini oshirish uchun xorijga yuborish, shuningdek, xorijdan yuqori malakali mutaxassislarni jalb qilish tartibini;

O‘zbekiston Respublikasi Moliya vazirligi (Haydarov) bilan birgalikda davlat tibbiyot tashkilotlari tomonidan ko‘rsatiladigan xizmat turlarini tadbirkorlik sub’yektlariga berish tartibini;

O‘zbekiston Respublikasi Oliy va o‘rta maxsus ta’lim vazirligi (Nabiyev) bilan birgalikda yetakchi xususiy tibbiyot tashkilotlari infratuzilmasini shartnoma asosida tibbiy kasb-hunar kollejlari va oliy ta’lim muassasalari talabalari, malakasini oshirayotgan amaliyotchi shifokorlar uchun o‘quv baza sifatida

foydalanish tartibini tasdiqlasin hamda 2018-2019 o‘quv yilidan boshlab joriy etsin;

b) manfaatdor vazirliklar va idoralar bilan birgalikda uch oy muddatda:

tibbiyot tashkilotlari faoliyatining shaffofligini ta’minlash hamda ko‘rsatilayotgan tibbiy xizmatlar sifatini oshirish maqsadida tibbiyot tashkilotlarini akkreditatsiyadan o‘tkazish tizimini bosqichma-bosqich joriy etish konsepsiyasini;

huquqiy tartibga solish mexanizmlarini, tegishli infratuzilmaga ega bo‘lgan zamonaviy tibbiyot majmualarini barpo etishni, mijozlarning mamlakatda bo‘lish davrida ularga tashkiliy-maslahat ko‘magini ko‘rsatgan holda mamlakatga kirish va chiqishning soddalashtirilgan tartibini nazarda tutuvchi tibbiy turizmni rivojlantirish konsepsiyasini;

xususiy tibbiyot tashkilotlari axborot tizimlarini “Sog‘liqni saqlash” axborot tizimlari kompleksiga va keyinchalik Yagona interaktiv davlat xizmatlari portaliga integratsiyalash bo‘yicha takliflarni ishlab chiqsin va O‘zbekiston Respublikasi Vazirlar Mahkamasiga kiritsin;

v) manfaatdor vazirliklar va idoralar bilan birgalikda uch oy muddatda qonun hujjatlariga ushbu qarordan kelib chiqadigan o‘zgartish va qo‘shimchalar to‘g‘risida O‘zbekiston Respublikasi Vazirlar Mahkamasiga takliflar kiritsin.

11. Mazkur qarorning bajarilishini nazorat qilish O‘zbekiston Respublikasi Prezidentining Davlat maslahatchisi R.Kasimov va O‘zbekiston Respublikasi Bosh vaziri o‘rinbosari Q.Akmalov zimmasiga yuklansin.

**O‘zbekiston Respublikasi Prezidenti**

**Sh.Mirziyoyev**

Toshkent shahri, 2017 yil 29 dekabr